

9 September 1991

Na ocasion di e di dos lustro di VIANA CHARITY FUND nos kier a repasa un rato, bida di e persona na cual e Fundacion aki ta nombra. Di e manera aki nos kier a honra un figura ku nunca kier a sali bin dilanti ora ta trata di yuda su profimo. Manuel Viana tabata den tur sentido di palabra un figura interesante! Nos sa cu ta un tarea duro, ma nos lo purba. Skirbi riba hende semper ta dificil. Pasobra na prome instante nos no sa kico nos kier bai enfoca. Esaki ta e prome dificultad. Y si nos mester bai skirbi positivo riba dje ta hopi mas dificil ainda. Esaki ta pasobra den hopi caso masha poco nos gusta duna credito na otro! Nos mes kier ta keto bai den centro di interes. Y pa bai pone otro den esaki, ta costa nos masha hopi esfuerso y trabou mes!

Y e otro motibo ku nos no ta skirbi mucho kos positivo ta ku nos ta kustumbra di tende, lesa y mira solamente kosnan negativo y nos ta biba den e keremento ku, den mundo no sa pasa kos bon! Ma awe nos ta sinti nos obliga di kibra e regla ey y haci un esepcion. Awe nos kier enfoca un figura cu semper di su bida tabata un hende positivo. Un hende cu semper a kere den hende! Nos kier duna boso algun informashon di un figura cu a hasi hopi bon den nos comunidad, principalmente pa esun di San Nicolas. Nos ta tribi bisa cu Manuel Viana lo no por a biba den e tempo aki! Pakico? Nos lo puntra. E no tabata cuadra den e mentalidad di arwendia! E tabata un Bon Samaritano Moderno! Un combinacion cu ta desapareciendo. Bon Samaritano nos ta topa masha poco. Corda pa nos topa cu uno moderno. Ma Manuel Viana tabata un di nan. Den su estandarte di caridad e tabata hiba dos lema ku desafortunadamente - ta bayendo perdi den nos mundo moderno. E prome tabata no laga bo man robes haya sa kico bo man drechi ta haci.

Den carni propio e tabata sa kico ta pobresa.

Tambe e tabata consciente di con dificil ta pa ora cu e otro ta den miseria e saca man pa pidi. Pa hopi dignidad ta hopi mas fuerte cu e miseria cu e ta pasa y Manuel Viana a compronde esaki masha bon mes. E no a siña esaki for di buki ni na skol. Ma bida mes a siña e! Ora bo logra den bida 'the hard way', anto e ora bo ta siña aprecia 'todas esas pequeñas cosas que van forjando toda una vida! Pobresa p e no tabata berguensa.

Pa hopi e tabata 'a way of life.' O niho bisa 'The hard way of life.' Ma en todo caso tabata pertenesa na bida. I Manuel Viana a compronde esaki. Pobresa ta pertenesa na e bida ku nos ta stima asina tanto. I pa haci e bida aki mas suave pa su profimo e tabata yuda... si yuda... ma den silencio! Den e man amigo cu e tabata duna e otro cu tabata den necesidad e tabata sa respecta e dignidad di esun cu tabata tin mester y cu tabat ricibi! Su man robes no tabata sa kico esun drechi tabata haci. P'esei mes e tabata yuda den silencio! Y p'esei lo no ta husto pa nos desvia y menciona tur loke el a haci! Esaki ta contra su filosofia! E tabata e Bon Samaritano cu a yuda... y a respecta e dignidad di e otro! Algo dificil den nos temponan di arwo.

Su otro tema den su estandarte di caridad tabata loke na spaño nan ta bisa: 'Haz bien y no mires a quien!' E tabata mescos cu e Bon Samaritano den e parabola den Biblia. Ora cu e otro nan a pasa bai laga e profimo herida riba caminda, e Bon Samaritano a yud'e. El a bai cu ne na unda nan por a sigui yud'e. El a paga e gastonan adelanta pasobra e no por a keda e mester a sigui bai y el a bisa: 'Si e gastonan ta mas di loke mi a duna boso, anto ora mi bin bek lo mi regla cu boso!' E Bon Samaritano no a puntra ken e herido tabata, ma den dje el a reconocé e otro... e profimo... y el a yuda! I Manuel Viana tambe kier a sigui yuda... ainda despues di su morto.

Y ta p'esei cu a institui Viana Charity Fund, pa sigui duna un man na esunnan cu tin mester. Anto hacie no cu ningun sorto di buya, ma semper bai respetando e otro. Y den silencio! Nos no ta exagera si nos bisa cu nos kier sigui cu e filosofia di e gran homber Manuel Viana y cu nos por resumi den e frase cortico aki: 'Haz bien y no mires a quien!'.

Aporte : Ernesto E. Rosenstand